

1209 cor ut credam ita, ut diximus, evenisse: & quod postquam novæ copiæ Venetiis in insulam missæ sunt, quibus apparebat, se ut hostem Reipublicæ peti, obstinato animo pugna abstinerit: & quum multa adhuc loca in Creta suo nomine tenerentur, facile tota provincia cessit. Quod si hostili in Venetos fuisset animo, non deerat quibus vel simpliciter precantibus, eam insulæ partem tradere potuisset: sic hostem ex hoste quasi versura facta Venetis comparare. Ii qui induci poterant, Genuenses erant, Venetæ gloriæ æmuli: sed cedere maluit, magis publico ocio, quam hosti Tepulo consulturus. Quidam scriptores in hac tempora rejiciunt memorabilem illam Joannis Trivisani in Genuenses victoriam, cujus proximo libro mentionem fecimus.

1210
*Novi motus
 Cretenses.*

Nec diu res Cretensium in ocio fuere; sed novus motus, atque eo, de quo nuper diximus, longe atrocior omnia turbavit: verum res a parvo admodum principio orta tantum excitavit incendium, ut pene tota insula eo conflagraret. Constans fama est, Petri cujusdam Philaneni consilio, Boreparitanæ arcis Præfecti, aliquot nobilium insulanorum equos furtim abactos. Delata res ad Paulum Quirinum, qui tum Dux erat: per edictum mandavit, ut ablata insulanis restituerentur. Quod ipsum quia non tam cito, ut illi voluissent, est præstitum, Græci quasi aliqua majore injuria moti, Petri Scordili, cujus abacti equi esse dicebantur, ductu, ingentem ex Reparitano agro prædam abduxere. Præsenti itaque tumultu freti Cretenses novarum rerum cupidi, continuo ad defectionem spectare cœperunt: ac brevi, quicquid a Milopotamo ad occasum insulæ est, a Veneto nomine defecit. Dux ad subitos Græcorum motus cohibendos Petrum Thonistum & Joannem Grittum ultra Milopotami scalas cum valido mittit exercitu. Hos per Psiuronensem saltum inexplorato ducentes, Constantinus Sevastus & Theodorus Melissinus cum non parva Græcorum manu insidiis excipiunt, exceptos fundunt, fugantque. Magna Venetorum cædes edita ab iis, qui locorum periti in territos, ac jam subito metu temere palatos, graf-
 faban-